

善見毗婆沙律卷第二

禮二

蕭齊外國沙門僧伽跋陀羅譯

衆僧已受即推目捷連子帝須爲和尚摩訶提婆爲阿闍梨授十戒大德末闡提爲阿闍梨與具足戒是時摩哂陀年滿二十即受具足戒於戒壇中得三達智具六神通漏盡羅漢僧伽蜜多阿闍梨名阿由波羅和尚名曇摩波羅是時僧伽蜜多年十八歲度令出家於戒壇中即與六法王登位以來已經六年二子出家於是摩哂陀於師受經及毗尼藏摩哂陀於三藏中一切佛法皆悉總持同學一千摩哂陀最大爾時阿育王登位九年有比丘拘多子名帝須病困劇持鉢乞藥得酥一撮其病增長命將欲斷向諸比丘言三界中慎勿懈怠語已飛騰虛空於虛空中而坐

即化作火自焚燒身入於涅槃是時阿育王聞人宣傳爲作供養王念言我國中比丘求藥而不能得王於四城門邊起作藥藏付藥滿藏中時波咤利弗國四方城門邊有四千客堂堂日得錢五千以供王用爾時王以錢一千供大德泥瞿陀一千供養塔像華香直取一千供給法堂一千供諸律師一千供衆僧四城門邊藥藏日一萬以用買藥直爾時佛法興隆諸外道等衰殄失供養利周遍乞食都無所得爲飢渴所逼託入佛法而作沙門猶自執本法教化人民此是律此是法旣不用佛法律威儀進止悉不得法來入寺住至布薩日來入僧中諸善比丘不與其同爾時目捷連子帝須自念言諍法起已不久當盛我若住僧衆諍法不滅即以弟子付摩哂

陀已目捷連子帝須入阿休河山中隱靜獨住諸外道比丘欲以已典雜亂佛法遂成垢濁外道猶行已法或事火者或五熱炙身或大寒入水或破壞佛法者是故諸善比丘不與同布薩自恣及諸僧事如是展轉乃至七

禮二

二

年不得說戒阿育王知已遣一大臣來入阿育僧伽藍白衆僧教滅鬪諍和合說戒大臣受王勅已入寺以王命白衆僧都無應對者臣便還更諮傍臣王有勅令衆僧滅諍而不順從卿意云何傍臣答言我見大王往伏諸國有不順從王即斬殺此法亦應如此傍臣語已使臣往至寺中白上座言王有勅令衆僧和合說戒而不順從上座答言諸善比丘不與外道比丘共布薩非不順從於是臣從上座次第斬殺次及王弟帝須而止帝須見

殺諸比丘即自念言此臣受取王勅僻故殺諸衆僧也問曰帝須是誰答曰是王弟同生爾時阿育王登位立弟爲太子太子一日入林遊戲見諸羣鹿陰陽和合太子作是念此諸羣鹿噉草飲水尚復如此豈況比丘在寺房舍牀蓐細軟飲食適口當無是事太子遊還到王所白王言我向出遊見諸羣鹿陰陽和合畜生噉草飲水尚有一事諸比丘僧在寺舍供養備足豈無此事王聞語已即自念言非狐疑處而生狐疑一日太子帝須觸忤王意王忿而語太子帝須我今以王位別汝七日作王訖已我當殺汝是時太子帝須雖受王位七日之中日夜妓樂飲食種種供養心不染著形體羸瘦憂惱轉劇所以爾者猶畏死故七日已滿王喚帝須問何意羸瘦飲

禮二

三

食妓樂不稱意耶帝須答言死法逼迫心不甘樂王聞語已語帝須言汝已知命七日當死猶尚惶怖況諸比丘出息入息恒懼無常心有何染著王語已帝須於佛法中即生信心又復一日太子帝須出遊行獵漸漸前行至阿練若處見一比丘坐名曇無德有一象折取木枝遥拂比丘太子見已心發懼喜而作願言我何時得如彼比丘曇無德比丘自逆知帝須心願比丘即以神力飛騰虛空於虛空中而坐令帝須得見從虛空飛往阿育僧伽藍大池中於水上而坐立脫僧伽梨鬱多羅僧置虛空中入池洗浴是時太子帝須見大德有如是神力心大歡喜而言今日我當出家即還宮中白王言我欲出家王必哀念聽我出家王聞帝須求出家心大驚怪答

言宮中妓女百味餽膳娛樂快樂何以出家王種種方便令其心止志意堅固永不肯住而答王言宮中姝女歡樂暫有會當別離大王歎言善哉即遣諸臣使平治道路掃灑清淨豎立幢幡種種莊嚴莊嚴竟已臣白王言裝束已辦王取太子公服天冠瓔珞莊嚴太子千乘萬騎圍遶奉送往至寺中衆僧見太子帝須出家心大歡喜有辦僧伽梨者鬱多羅僧者安陀會者鉢盂者擬待太子即出家已是時太子往到禪房至曇無德比丘所求欲出家國中豪貴諸長者兒一千童子隨太子出家國中人民見太子出家各自念言太子如此尊貴尚捨王位出家修道我等貧窮何所戀慕念已無數人衆悉隨出家阿育王登位四年太子出家復有王外甥阿耆婆羅

門是僧伽蜜多塔已有一男兒阿耆聞太子出家心中驚喜往至王所即白王言我今欲隨太子出家願王聽許王答善哉即與太子俱白出家如是於佛法中多有刹利出家佛法興隆時帝須言當知此臣僻取王意殺諸比丘臣殺未已帝須比丘便前遮護臣不得殺臣即置刀往白王言我受王勅令諸比丘和合說戒而不順從我已依罪次第斬殺殺猶未盡帝須比丘即便遮護不能得殺臣白王言帝須比丘爲殺以不王聞臣言殺諸比丘即大驚愕心中懊惱悶絕躡地以冷水灑面良久乃甦即語臣言咄咄我遣汝入寺欲令衆僧和合說戒何以專輒而殺衆僧王往寺中白諸衆僧我前遣一臣教令和合說戒不使殺諸比丘此臣專輒枉殺衆僧不審此

禮二

五

事誰獲罪耶有比丘答言由王故殺此是王罪或有比丘言兩俱得罪有一比丘即問王言王心云何有殺心不王答言我本以功德意遣無殺心也若王如此王自無罪殺者得罪王聞如是言已心生狐疑問諸比丘有能斷我狐疑者不若能斷我狐疑心者我當更豎立佛法諸比丘答言有目捷連子帝須能斷狐疑豎立佛法於是即遣法師四人人各有比丘一千侍從而去復遣大臣四人人各有一千人將從往迎大德目捷連子帝須須得而歸是時二部衆往至阿休河山中迎取目捷連子帝須到已而言王喚帝須帝須不去王復更遣法師八人人各有比丘一千侍從大臣八人人各一千侍從到已復言王喚帝須帝須不去王遲望二使經久未反王心

狐疑王復問諸大德大德我已遣二使往迎
目捷連子帝須使已經久而不見至衆僧答
言恐迎者僻宣王意言喚帝須是故不來王
復問言云何作諸語而得來耶衆僧答王當
作是言佛法已沒願屈大德來更共豎立乃
可得來王聞是言更遣法師十六人人各比
丘一千侍從大臣十六人人各將一千人王
復問彼法師爲老爲少衆僧答言老若其老
者當用輦迎衆僧答言不得乘輦王復問言
彼大德者住在何處答言阿休河山中若爾
當遣舫乘往迎勅使者言汝若到已當請大
德住大舫中可使四邊帶仗防護是時大衆
使者發去到阿休河山中即以王命白大德
言今佛法已沒仰屈大德來共豎立於是大
德聞使語已言我出家正爲佛法今時至矣

禮二

六

即取坐具而起帝須自念言明當至彼咤利
弗國是時阿育王夜夢見如是相貌有一白
象而來以鼻摩掌王頭捉王右手明旦王召
相師曰我夜夢如是相貌爲吉爲凶有一相
師即答王言捉王手者是沙門像也大王聞
相師語已即得信來白王大德帝須今日已
至王聞至已即出往迎王自入水至膝大德
帝須欲上王以右手捧接大德大德帝須便
捉王手左右拔劍欲斫大德帝須何以故阿
育王法若人捉王頭及手即便斫頭是故拔
劍欲斫爾時王見水中拔劍影王迴顧言咄
咄我昔勅臣往至寺中令衆僧和合說戒而
僻取我意殺諸比丘而汝今者復欲殺耶止
止莫作我罪法師問曰比丘不得捉白衣手
云何得捉答曰王爲欲聞法故往請來王即

是大德弟子故得捉手於是王將大德往園林中住三重防衛王自爲大德洗脚以油摩之摩竟於一邊而坐王自念言此大德能斷我疑不若能斷我疑者亦能斷諍法然後佛法豎立王念我且當試大德我欲見大德神

樓二

七

通力願爲示現帝須答言汝今樂見何等神力王言我欲見大地震動帝須問曰爲欲使一邊動一切動耶王復問言於此二種何者爲難帝須答言譬如銅盤盛滿中水有人動盤水悉動難半動半不動難王言半動半不動甚難帝須答言如是大王王言欲見半動半不動帝須語王周迴四方四由旬彈繩作界東方安車南方安馬西方安人北方安銅盤水使各騎界上一脚在內一脚在外銅盤水當安界上半入界內半在界外王即隨教

作已於是帝須即入第四禪從禪定起而向王言善見大王大德帝須即以神力能使四方四由旬外悉大震動界內不動車馬及人外脚悉動內脚不動水半動半不動於是大王見大德神力如此即大歡喜我先所疑今得斷也於佛法中惡法得滅王即問大德帝須我先遣一臣到寺令僧和合說戒而臣專輒殺諸比丘此罪誰得耶帝須答言大王有殺心不王即答言我無殺心若無殺心王無罪也即便爲王說本生經佛語諸比丘先籌量心然後作業一切作業皆由心也帝須欲演本生經大王往昔有一鷓鴣鳥爲人籠繫在地愁怖便大鳴喚同類雲集爲人所殺鷓鴣問道士我有罪不道士答言汝鳴聲時有殺心不鷓鴣鳥言我鳴伴來無殺心也道士

即答若無殺心汝無罪也而說偈言

不因業而觸 不因心而起 善人攝心住

罪不橫加汝

如是大德帝須方便令王知己七日在園林

中帝須教王是律是非律是法是非法是佛

說是非佛說七日竟王勅以步障作隔所見

同者集一隔中不同見者各集異隔處處隔

中出一比丘王自問言大德佛法云何有比

丘答言常或言斷或言非想或言非想非非

想或言世間涅槃王聞諸比丘言已此非比

丘即是外道也王既知己王即以白衣服與

諸外道驅令罷道其餘隔中六萬比丘王復

更問大德佛法云何答言佛分別說也諸比

丘如是說已王更問大德帝須佛分別說不

答言如是大王知佛法淨已王白諸大德願

大德布薩說戒王遣人防衛眾僧王還入城

王去之後眾僧即集眾六萬比丘於集眾中

目犍連子帝須爲上座能破外道邪見徒眾

眾中選擇知三藏得三達智者一千比丘如

昔第一大德迦葉集眾亦如第二須那拘集

眾出毗尼藏無異一切佛法中清淨無垢第

三集法藏九月日竟大地六種震動所以一

千比丘說名爲第三集也法師問曰三集眾

誰爲律師於閻浮利地我當次第說名字第

一優波離第二馱寫拘第三須那拘第四悉

伽婆第五目犍連子帝須此五法師於閻浮

利地以律藏次第相付不令斷絕乃至第二

集律藏從第三之後目犍連子帝須臨涅槃

付弟子摩哂陀摩哂陀是阿育王兒也持律

藏至師子國摩哂陀臨涅槃付弟子阿栗咤

從爾已來更相傳授至于今日應當知之我
今說往昔師名從閻浮利地五人持律藏至
師子國第一名摩晒陀第二名一地史第三
鬱帝史第四名參婆樓第五名拔陀沙此五
法師智慧無比神通無礙得三達智於師子
國多教授弟子摩晒陀臨涅槃付弟子阿栗
咤阿栗咤付弟子帝須達多帝須達多付弟
子伽羅須末那伽羅須末那付弟子地伽那
地伽那付須末那須末那付伽羅須末那伽
羅須末那付曇無德曇無德付帝須帝須付
提婆提婆付須末那須末那付專那伽專那
伽付曇無波離曇無波離付爾摩爾摩付優
波帝須優波帝須付法巨法巨付阿婆耶阿
婆耶付提婆提婆付私婆如此諸律師智慧
第一神通無礙得三達智愛盡羅漢如是師

師相承至今不絕法師曰我今又說根本因
緣爾時於波咤利弗國集第三毗尼藏竟往
昔日捷連子帝須作如是念當來佛法何處
久住即以神通力觀看閻浮利地當於邊地
中興於是目捷連子帝須集諸衆僧語諸長
老汝等各持佛法至邊地中豎立諸比丘答
言善哉即遣大德末闍提汝至罽賓捷陀羅
咤國中摩訶提婆至摩醯娑末陀羅國勒棄
多至婆那婆私國曇無德至阿波蘭多迦國
摩訶曇無德至摩訶勒棄多至更那世界國
末示摩至雪山邊國須那迦鬱多羅至金地
國摩晒陀鬱帝夜參婆樓拔陀至師子國各
豎立佛法於是諸大德各各眷屬五人而往
諸國豎立佛法爾時罽賓國中有龍王名阿
羅婆樓國中種禾稻始欲結秀而龍王注大

洪雨禾稻沒死流入海中爾時大德末闍提比丘等五人從波咤利弗國飛騰虛空至雪山邊阿羅婆樓池中下即於水上行住坐卧龍王眷屬童子入白龍王言不知何人身著赤衣居在水上侵犯我等龍王聞已即大瞋忿從宮中出見大德末闍提龍至忿心轉更增盛於虛空中作諸神力種種非一令末闍提比丘恐怖復作暴風疾雨雷電霹靂山巖崩倒樹木摧折猶如虛空崩敗龍王眷屬童子復集一切諸龍童子身出烟竟起大猛火雨大礫石欲令大德末闍提恐怖既不恐怖而便罵言禿頭人君爲是誰身著赤衣如是罵詈大德顏色不異龍王復更作是罵言捉取打殺語已更喚兵衆現種種神變猶不能伏大德末闍提以神通力蔽龍王神力向龍

世二

十一

王說若汝能令諸天世人一切悉來恐怖我者一毛不動汝今更取須彌山王及諸小山擲置我上亦不能至大德作是語已龍王思念我作神力便已疲倦無所至到心舍忿怒而便停住是時大德知龍王心以甘露法味教化示之令其歡喜歸伏龍王受甘露法已即受三歸五戒與其眷屬八萬四千俱受五戒復有雪山鬼夜叉捷闍婆鳩槃荼鬼等聞大德末闍提說法已即受三歸五戒復有夜叉五人與眷屬俱訶梨帝耶夜叉尼有五百子得須陀洹道於是大德末闍提喚一切夜叉及龍王從今已後莫生瞋恚莫殘害人民禾稻於諸衆生生慈悲心令得安樂一切諸龍鬼等答言善哉如大德教即當順從即日龍王作大供養龍王遺取已七寶牀與末闍

提末闍提坐於牀上龍王立近末闍提邊以扇末闍提是時闍賓捷陀勒叉國人民常以節日集往祠會龍王到已見大德末闍提各相謂言此比丘神力乃勝龍王於是人民悉禮末闍提禮已而坐末闍提為諸人民說讀譬經說已八萬衆生即得道果千人出家法師言從昔至今闍賓國皆著袈裟光飾其境而說偈言

闍賓捷陀國 爾時末闍提 瞋恚大龍王
教化令受法 復有餘大衆 從繫縛得解
八萬得天眼 出家一千衆

大德摩訶提婆往至摩醯婆慢陀羅國至已為說天使經說竟四萬人得道果皆悉隨出家而說偈言

摩訶提婆有大神力得三達智到摩醯婆

十二

十二

為說天使經 度脫諸衆生 四萬得天眼
皆悉隨出家

大德勒棄多往娑那婆私國於虛空中而坐已為說無始經說已六萬人得天眼七千人出家即起五百寺而說偈言

大德勒棄多 有大神通力 到娑那婆私
於虛空中坐 為說無始經 衆生得天眼
出家七千人 五百僧伽藍

大德曇無德往阿波蘭多國到已為諸人民說火聚譬經說已令人歡喜三萬人得天眼令服甘露法從利利種男女各一千人出家如是佛法流布而說偈言

大德曇無德 有大神通力 往阿婆蘭多
說火聚經法 令服甘露法 衆生得天眼
一千比丘僧 比丘尼如是

大德摩訶曇無德往至摩訶勒咤國到已爲
說摩訶那羅陀迦葉本生經說已八萬四千
人得道三千人出家如是佛法流通而說偈
言

大德摩訶曇 有大神通力 往摩訶勒咤

說迦葉本經

禮二

衆生得道果 出家三千人

十三

大德摩訶勒棄多往更那世界國到已爲說
迦羅羅摩經說已更那世界國七萬三千人
得道果千人出家更那世界佛法流通而說
偈言

摩訶勒棄多 有大神通力 往更那世界
說摩迦羅經 衆生得道果 出家一千人
大德末示摩大德迦葉大德提婆鈍毗帝須
復大德提婆往雪山邊到已說初轉法輪經
說法已八億人得道大德五人各到一國教

化五千人出家如是佛法流通雪山邊而說
偈言

大德末示摩 有大神通力 往到雪山邊
說初法輪經 衆生得道果 出家五千人
大德須那迦那鬱多羅往至金地國到已於
金地中有一夜叉尼從海中出往到王宮中
夫人共生兒已夜叉即奪取而食爾時王夫
人生一男兒見大德須那迦來即大恐怖而
作念言此是夜叉尼伴也即取器仗往欲殺
須那迦須那迦問言何以持器仗而來諸人
答言王宮中生兒而夜叉尼伴奪取而食君
將非取伴耶須那迦答言我非夜叉尼伴我
等名爲沙門斷殺生法護持十善勇猛精進
我有善法是時夜叉尼聞王宮中生兒相與
圍遶從海中出作如是言今王生兒我當往

取食王宮中國人見夜叉衆來皆大驚怖往
白大德是時須那迦即化作夜叉大衆倍於
彼衆而圍遶之夜叉尼等見化夜叉而作念
言彼夜叉者當已得國今將欲來取食我等
作是念已即各走去不得迴顧於是化夜叉
衆隨後而逐不見而止大德須那迦即誦呪
防護國土使諸夜叉斷不得入即爲國人民
說梵網經說已六萬人得道果復有受三歸
五戒者三千五百人爲比丘僧一千五百人
爲比丘尼於是佛法流通法師言從昔至今
王若生兒悉皆取名須鬱多羅而說偈言
大德須那迦 鬱多羅比丘 有大神通力
往到金地國 爲說梵網經 衆生得道果
三千五百僧 一千五百尼
大德目捷連子帝須與衆僧遺摩晒陀往師

子洲摩晒陀即作是念此時可去以不摩晒
陀即入定觀師子阿菟羅陀國王名聞茶私
婆年已老耄不堪受化若往化者佛法亦不
久住我今且止去時未至若王命終太子代
位我當共往建立佛法我今且往外家欲問
訊母復更自念到母國已當還此不仍往師
子洲也摩晒陀往師所頭面禮足及比丘僧
從阿育王僧伽藍出摩晒陀爲上座僧伽蜜
多兒沙彌須末那等六人及一優婆塞名盤
頭迦與共俱去過王舍城至南山村從此次
第而去至母國也法師曰何以故昔阿育王
封鬱支國初往至國次第而去即到南山山
下有村名卑提寫大富長者以女與阿育王
爲婦到國而生一男兒名摩晒陀摩晒陀年
已十四後阿育王便登王位留婦置鬱支國

在卑提寫村住是以經文注言摩哂陀經六

月日而至母所爾時摩哂陀次第到母國已

母出頭面作禮作禮已竟爲設中食即立大

寺名卑地寫時摩哂陀少時住寺而作是念

此間所作已訖時可去不摩哂陀復自思念

我今且當待阿育王遣使往師子洲授太子

天愛帝須爲王竟然後我往使彼太子若登

位者得阿育王拜授爲王并聞如來功德必

大歡喜我同其出遊眉沙迦山是時我與相

見過一月已當往到彼四月十五日衆僧集

布薩時便共籌量於是衆僧各各答言時可

去矣法師曰往昔說偈讚言

上座摩哂陀 大德鬱地吏 大德鬱帝吏

大德跋陀多 大德參婆樓 沙彌修摩那

皆得三達智 婆塞槃頭迦 已得見道跡

此諸大士等

爾時天帝釋知聞荼私婆王便已終歿即

白摩哂陀言師子阿菟羅陀國王命已壽終

今太子天愛帝須已登爲王我念往昔佛在

世時已說摩哂陀比丘當在師子土中興隆

佛法是故大德今應當去我亦侍從俱往至

彼天帝釋即作是言爾時佛在菩提樹下以

天眼遍觀世間即見師子洲中佛法興盛勅

語我言可與大德摩哂陀俱往師子洲中豎

立佛法是故我今作如是言大德摩哂陀已

受天帝釋語已即從卑地寫山與大衆俱飛

騰虛空到師子阿菟羅陀國往至東方眉沙

迦山下是故從古至今名爲像山法師曰今

說往昔偈言

住卑地寫村 已經三十日 時至宜應去

往到師子洲 從閻浮利地 次第飛騰往
譬如虛空鴈 羅列不失次 如是諸大德
根本因緣起 國東眉沙山 鰲隼如黑雲
即到山頂上 徘徊而來下

爾時諸大德到師子洲中已摩哂陀爲上座
於時佛涅槃已二百三十六歲佛法流通至
師子洲中應當知之爾時阿闍世王登王位
八年佛涅槃此年師子童子而於彼洲初立
作王又有童子名毗闍耶往師子洲中安立
人民住止處竟爾時閻浮地王名鬱陀耶跋
陀羅登王位已十四年此毗闍耶於師子洲
中命終鬱陀耶跋陀羅已十五年半頭婆修
提婆於師子洲登王位爾時閻浮利地若那
迦逐寫迦登王位二十年半頭婆修提婆王
於彼命終阿婆耶即代爲王閻浮利地王名

禮二

十七

修佛那伽作王十七年阿婆耶王二十年有
波君茶迦婆耶起兵伐阿婆耶王得仍即立
代爲王閻浮利地王名迦羅育在位已十六
年波君茶迦婆耶已十八年閻浮利地王名
旃陀掘多作王已十四年波君茶迦婆耶命
終聞茶私婆代閻浮利地王名阿育已在位
十七年聞茶私婆命終天愛帝須代爾時佛
涅槃後阿菟樓陀王閔跼王在位各八年那
迦逮婆迦作王十四年修佛那迦作王十八
年其兒代名阿育作王二十八年阿育王有
十兒並登爲王二十二年次玃難陀代作王
二十二年復有旃陀掘多作王二十四年賓
頭沙羅王代在位二十八年阿育王代位已
十八年摩哂陀到師子洲中即是王種次第
應當知是時天愛帝須王有星宿惡忌避出

使臣打鼓宣令王當出使臣打鼓宣令王當
出避與四萬衆圍遶出城到眉沙迦山王欲
行獵爾時山中有一樹神欲令王得見大德
摩哂陀樹神化作一鹿去王不遠示現噉草
而便徐行王見化鹿即張弓撿箭引弓欲射
王復念言我當諦射此鹿鹿仍迴向暗婆陀
羅路而走王即逐後到暗婆陀羅化鹿知去
摩哂陀不遠而滅於是摩哂陀見王已近而
作是念今以神力令王正見我一人不見餘
人大德摩哂陀即喚帝須帝須汝當善來王
聞喚已而便念言今此國中誰敢喚我名者
此何等人著赤衣服割截而成喚我名字生
狐疑心此是何等爲是人乎爲是鬼神耶於
是大德摩哂陀即答言我等沙門釋種法王
之子爲哀愍大王從閻浮利地故來到此爾

懷二

十八

時天愛帝須王與阿育王以有書信遙作知
識是時天愛帝須王功德瑞相有山名車多
迦山邊生一竹林林中有三竹大如轆一名
藤杖二名華杖三名鳥杖藤杖者其色白如
銀金藤繞纏華杖者黃碧絳黑白華種種雜
華瓔珞華杖鳥杖者鷹鷂者婆鳥者毗迦鳥
如是種種衆鳥復有四足衆生如生氣無異
法師曰今說往昔偈讚

車多迦山邊 忽生一竹林 林中有三竹
其色白如銀 黃白絳碧黑 金藤圍繞纏
衆鳥及四足 種種雜華照

海中復出珊瑚真珠摩尼金銀種種雜寶復
有八種真珠馬珠象珠車珠婆羅迦珠婆羅
耶珠纏指珠迦鳩陀婆羅珠世間珠如是天
愛帝須王遺信齎上三竹及衆寶物并八真

珠獻阿育王到已阿育王見大歡喜即答餉以五種服飾傘拂劍天冠七寶華屐及衆寶物不可計數何謂爲衆物檀陀迦螺及常滿河水騰沙迦華頻伽色髮衣一雙手巾青梅檀有土如平旦時色阿羅勒果阿摩勒果玉

女法師曰今說往昔偈言

禮三

十九

天冠拂傘劍 七寶裝華屐 頻伽檀陀螺
色髮衣一雙 金鉢犧一具 阿耨達池水
鮮白貴手巾 無價青梅檀 平旦色白土
龍王石眼藥 菴摩阿梨勒 無上甘露藥
鸚鵡所獻果 其數五百擔 此諸衆妙物
阿育王功德

如是諸妙物是世間餉也復有三寶餉阿育王言我已歸依佛歸依法歸依僧作優婆塞此是釋種子法於三寶中汝當至心信受佛

法阿育王遣信答天愛帝須王餉并授王位天愛帝須王以三月十五日受拜王位經一月日摩哂陀等來到復聞摩哂陀說我是釋種子天愛帝須王於獵場中即復思憶阿育王書言有釋種子即投弓放箭却坐一面各相問訊法師曰今說往昔偈讚言

投弓放箭却坐一面大王坐已問訊大德句次有義時四萬人往到王所各自圍遶是時軍衆到已大德摩哂陀即現六人王時見已而問大德此六人者何時來也答言與我俱來王復問於閻浮利地有餘如此沙門不答言彼國土者沙門衆多袈裟之服晃曜國內皆三達智神通無礙懸知人心漏盡羅漢佛弟子聲聞衆多王復問言諸大德等乘何來此答言我等不用水陸而來王自念言

當從虛空來也摩哂陀復作是念王有智慧無智慧耶我當試之有一菴羅樹王坐近樹摩哂陀因樹而問大王此是菴羅樹耶王即答言是菴羅樹置此菴羅樹更有樹無答言更有復置此樹更有樹無答言更有復置此樹更有餘樹無即答言有復問置餘樹更有樹無答此是菴羅樹耶摩哂陀答善哉大王有大智慧摩哂陀言王有宗親無答甚多大德置王宗親餘人有宗親無答言極多置王宗親置餘人宗親更有餘人無王便答言我即是也摩哂陀答善哉善哉大王聰明自知已身非親非餘人親於是大德摩哂陀言此王智慧能豎佛法即爲說咒羅訶象譬經說已王與四萬大衆一時俱受三歸是時王聽法已遣信還國欲取飲食王復念言即今非

時非沙門食也飲食到已王自欲獨食意復疑曰而問諸大德大德食不答言此非我等沙門食時王問何時得淨也答曰從旦至中得應淨法王曰諸大德今可共還國答言不隨我等住此若諸大德住此請童子隨去答言此童子者已得道果通知佛法今欲出家王言若爾者我明當遣車來奉迎語已即頭頂禮足而便還去王去不久摩哂陀喚沙彌修摩那今應說法時汝可唱轉法輪修摩那白師言我今唱令聲至何處答言使聲滿師子國修摩那答言善哉大德即入第四禪已從禪定起自勸心已令師子國一切人民俱聞我聲仍便三唱三唱已竟王聞此聲即遣人往到諸大德所問有何等觸犯諸大德令聲驚大乃至如是大德答言無所驚動此是

唱聲欲演佛法是時地神聞沙彌聲即大叫
喜喜聲徹虛空中虛空諸神展轉相承聲至
于梵天梵天聞已一切來集是時摩哂陀即
說平等心經說已諸天無數皆得道跡摩睺
羅伽迦樓羅等皆受三歸如昔大德舍利弗
說平等經無數人得道摩哂陀今說亦復如
是過夜至明旦王遣車來迎到已使者白諸
大德今車已至願屈而去答使者言我等不
乘車也汝但先還今當隨後作是答已即飛
騰虛空往阿菟羅國城東而住是往昔諸佛
住處而下摩哂陀等既初下此處即名初住
處王遣使者迎諸大德即召諸臣共料理屋
舍諸臣聞王語已心中歡喜王復念言昨所
說法沙門法者不得高廣大牀王籌量未竟
迎使者還已到城門使者見諸大德已先在

城東衣服儼然心大驚喜入白王言大德已
至王問使者諸大德爲乘車不使者答言不
肯乘車使者復言我在前還諸大德在後來
今已先至住在城門王聞使者語已勅言不
須安高廣牀王教諸臣令敷地上安茵褥教
已王即出迎諸大德諸臣即取氍毹重敷褥
上國中相師見王以席敷地而自念此諸沙
門便領此地永不移轉王迎諸大德到已頭
頂禮足以種種供養迎入國內於是大德摩
哂陀等見席敷地各自念言我等輩法於此
地中不復移轉而各就座王以餚膳飲食種
種甘味自手斟酌供設備足王遣信喚宮中
大夫人名阿菟羅與五百夫人使各齎華香
供養王仍却坐一面於是大德摩哂陀即爲
大眾雨大法雨說餓鬼本生經宮殿本經開

演四諦說已五百夫人皆得道果國中人民
先隨王到眉沙迦山中者各相宣傳稱歎諸
大德巍巍功德一切國中遠近悉來到國衆
數填塞不得看諸大德作大叫聲王問何物
叫聲答言國中民人不得見諸大德比丘故
大叫耳王自念言此中窄狹不得悉入王語
諸臣可更料理大象屋中以白沙覆地五色
華散上懸施帳幔諸大德等在象王處坐諸
臣敷施已竟入白王言於是諸比丘往象屋
中到已各坐爲說天使經說已千人得道於
象屋中人衆轉多復移於城南門外園林名
難陀於中敷施薦席諸大德比丘往到爲衆
說犢譬經千人得道從初日到第三說法二
千五百人皆得道跡諸大德住難陀園國中
長者婦女來到已作禮問訊從旦至冥諸

禮二

手三

比丘即從座而起諸臣驚怪而問諸大德今
欲何去答言我等欲還所住臣即白大王諸
法師欲去大王許不王即白言大德日今已
冥云何得去且停住此時諸比丘答言不住
王復請言我父王有園名曰眉伽去此不遠
不近可在中住往來便易於是諸大德隨王
請住明旦大王復往問訊到已作禮而便白
言夜來得安眠不起居何如此園可住以不
諸大德答言可住乃說修多羅偈佛言我聽
諸比丘園林中住王聞說已心大歡喜即以
金瓶水授摩哂陀手水下著手是時國土地
大震動王即驚怖白大德言大德何以如此
地皆大動摩哂陀答大王勿有恐懼此國土
者十力法興欲造大寺在此園地是故地爲
先瑞故現此耳王聞語已倍增踊躍於是摩

晒陀明日與衆俱往王宮中食食訖還往難陀園中

善見毗婆沙律卷第二

音釋

殄徒典切 噉徒監切 忤五故切 愕五各切
滅也 噉食也 忤違戾也 愕驚遽也
甦素姑切 遲直利切 輦車也 舫甫安切
而更生也 遲待也 輦以諸切 舫甫安切
也素何切 罽居刈切 醯呼鷄切 霹靂霹靂切
挈素何切 罽居刈切 醯呼鷄切 霹靂霹靂切
擎直炙切 耄莫報切 耄莫報切 徘徊徘徊切
投也 耄莫報切 耄莫報切 徘徊徘徊切
徊胡來切 狹狹胡來切 捷履所切 犧許羈切
塞也 狹狹胡來切 捷履所切 犧許羈切
狹胡來切 捷履所切 犧許羈切